



KHUTBAH JUM'AT

TAJUK : "RAJA BERDAULAT NEGERI BERKAT"

TARIKH: 15 JANUARI 2021 / 02 JUMAD AL-AKHIR 1442

الْحَمْدُ لِلَّهِ الْقَائِلِ :

يُسَبِّحُ لِلَّهِ مَا فِي السَّمَوَاتِ وَمَا فِي الْأَرْضِ الْمَلِكِ الْقُدُّوسِ الْعَزِيزِ الْحَكِيمِ ﴿١﴾

(Surah al-Jumu'ah: ayat 1)

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ، وَلَا تَمُوتُنَّ إِلَّا وَأَنْتُمْ مُسْلِمُونَ.

SIDANG JUM'AT YANG DIRAHMATI ALLAH ﷻ,

Bertaqwalah kepada Allah ﷻ dengan melaksanakan segala perintah-Nya dan menjauhi segala tegahan-Nya. Bersamalah kita menjaga diri, keluarga dan masyarakat daripada segala perkara yang membawa musibah. Mimbar pada hari ini akan membicarakan khutbah yang bertajuk "RAJA BERDAULAT NEGERI BERKAT".

SIDANG JUM'AT YANG DIMULIAKAN,

Pada tahun ini, kita rakyat Negeri Sembilan meraikan ulang tahun Hari Keputeraan Duli Yang Maha Mulia Yang di-Pertuan Besar Negeri Sembilan Darul Khusus Tuanku Muhriz Ibni AlMarhum Tuanku Munawir yang ke-73. Ulang tahun hari keputeraan ini tetap disambut dengan penuh rasa kesyukuran walaupun tidak seperti tahun-tahun sebelumnya. Gelombang ketiga wabak COVID-19 yang melanda negara amat membimbangkan dengan menyaksikan peningkatan baharu mencecah empat angka saban hari.

Mutakhir ini, beberapa negeri telah dikuatkuasakan Perintah Kawalan Pergerakan (PKP). Manakala Negeri Sembilan termasuk dalam negeri yang dikenakan Perintah Kawalan Pergerakan Bersyarat (PKPB). Oleh yang demikian, seluruh umat Islam di negeri bertuah ini diseru agar mematuhi perintah ini, melakukan muhasabah diri dan memohon ke hadrat Allah ﷻ agar kita sentiasa dipelihara daripada jangkitan COVID-19.

SIDANG JUM'AT YANG BERBAHAGIA,

Agama Islam ialah agama yang lengkap lagi sempurna. Firman Allah ﷻ dalam surah Ali-Imran ayat 19:

إِنَّ الدِّينَ عِنْدَ اللَّهِ الْإِسْلَامُ

Maksudnya: Sesungguhnya agama (yang benar dan diredai) di sisi Allah ialah Islam.

Agama Islam yang syumul telah menetapkan panduan dalam semua aspek termasuk dalam sistem beraja. Negeri Sembilan mempunyai tradisi

yang unik berdasarkan adat pepatih yang menjadi amalan di negeri ini. Dengan keimanan, ketakwaan dan pegangan *Ahli Sunnah Wal Jamaah* yang ada pada seluruh rakyat, raja dapat didaulatkan. Sebagai rakyat, kita seharusnya menumpahkan rasa taat setia yang tidak berbelah bahagi kepada Duli Yang Maha Mulia Tuanku sebagai raja dan Yang di-Pertuan yang menaungi negeri ini. Baginda ialah tonggak yang berperanan memertabatkan agama Islam, melindungi dan memayungi rakyat dengan penuh keadilan dan kasih sayang.

Firman Allah ﷻ dalam surah An-Nahl ayat 90:

﴿إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ﴾

Maksudnya: Sesungguhnya Allah menyuruh berlaku adil, berbuat kebaikan, serta memberikan bantuan kepada kaum kerabat. Allah melarang perlakuan yang keji dan mungkar serta kezaliman. Allah mengajar kamu (dengan suruhan dan larangan-Nya ini), supaya kamu mengambil peringatan dan mematuhi-Nya.

Suruhan berlaku adil ini juga dikukuhkan menerusi sabda Rasulullah ﷺ:

﴿إِنَّ الْمُقْسَطِينَ عِنْدَ اللَّهِ عَلَىٰ مَنَابِرَ مِنْ نُورٍ عَنِ يَمِينِ الرَّحْمَنِ عَزَّ وَجَلَّ، وَكَلَّمَا يَدَيْهِ يَمِينُ الَّذِينَ يَعْدِلُونَ فِي حُكْمِهِمْ وَأَهْلِيهِمْ وَمَا وَلُوا،﴾

Maksudnya: Golongan yang berlaku adil berada di sisi Allah di atas mimbar yang dicipta daripada cahaya, di sebelah kanan Tuhan yang bersifat al-Rahman ‘azzawajalla. Golongan tersebut adil dalam menetapkan hukuman, adil dalam keluarga, dan adil terhadap orang yang dipimpin. (Riwayat Muslim)

SIDANG JUM'AT YANG DIRAHMATI ALLAH ﷻ,

Sempena Hari Keputeraan Duli Yang Maha Mulia Yang di-Pertuan Besar Negeri Sembilan Darul Khusus Tuanku Muhriz Ibni al-Marhum Tuanku Munawir yang ke-73, marilah kita mendoakan kesihatan, kebahagiaan, dan kesejahteraan Ke bawah Duli Yang Maha Mulia Yang di-Pertuan Besar Negeri Sembilan. Rakyat mengharapkan agar baginda sentiasa berada dalam inayah dan ria'yah Allah ﷻ, seterusnya dapat menaungi negeri tercinta ini agar terus berada dalam keamanan dan kedamaian, serta dipelihara daripada segala bala bencana dan kemudaratan.

بَارَكَ اللهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الْآيَاتِ وَالذِّكْرِ الْحَكِيمِ، وَتَقَبَّلَ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا فَوْزَ
الْمُسْتَغْفِرِينَ وَيَا نَجَاةَ التَّائِبِينَ .